



Ein cyf: RE/741/22

Huw Irranca-Davies AS/MS,
Cadeirydd, Y Pwyllgor Deddfwriaeth, Cyfiawnder a'r Cyfansoddiad

22 Gorffennaf 2022

Annwyl Huw,

Memorandwm Cydsyniad Deddfwriaethol ar Fil Banc Seilwaith y DU

Diolch am eich llythyr ynglŷn â'r Memorandwm Cydsyniad Deddfwriaethol ar Fil Banc Seilwaith y DU (y Bil). Rwyf wedi ymateb i'ch cwestiynau yn eu tro fel y nodir isod.

1. Ar 13 Mai 2022, gwnaeth y Cwnsler Cyffredinol ddatganiad ysgrifenedig ar Raglen Ddeddfwriaethol Llywodraeth y DU. Yn y datganiad hwnnw, dywedodd: "Yn dilyn trafodaethau yng nghyfarfod cyntaf y Pwyllgor Sefydlog Rhyngweinigol ar 23 Mawrth, rwyf wedi fy nghalonogi gan y ffaith y cafwyd ymgysylltu cadarnhaol rhwng swyddogion Llywodraeth y DU a Llywodraeth Cymru ar nifer o Filiau yn rhaglen ddeddfwriaethol Llywodraeth y DU." Mae Bil Banc Seilwaith y DU yn un o'r 12 o Filiau y tynnir sylw atynt yn y datganiad. A allwch chi gadarnhau bod y Bil wedi bod yn destun trafodaethau rynglywodraethol cyn cael ei gyflwyno yn Senedd y DU?

Gallaf gadarnhau bod y Bil yn destun trafodaeth rynglywodraethol cyn iddo gael ei gyflwyno yn Senedd y DU.

Cynhaliwyd deialog rhwng swyddogion Trysorlys ei Mawrhydi a Llywodraeth Cymru drwy gydol y llynedd, cyn ac ar ôl sefydlu'r Banc. Cyfarfûm â Chadeirydd a Phrif Swyddog Gweithredol y Banc yn fuan ar ôl iddynt gael eu penodi ym mis Hydref 2021 i drafod nodau ac amcanion y Banc, a'i berthynas â Chymru a Llywodraeth Cymru.

Parhaodd yr ymgysylltu rhwng swyddogion Llywodraeth Cymru a Thrysorlys ei Mawrhydi yn 2022 gan fod y Bil wedi'i gynnig i roi'r Banc ar sail statudol.

Yn ystod y Pwyllgor Sefydlog Rhyngweinigol ar Gyllid ar 15 Mehefin, mynegais gefnogaeth, mewn egwyddor, i greu Banc Seilwaith y DU. Fodd bynnag, nodais hefyd y byddem wedi hoffi gweld Banc ag iddo gylch gwaith ehangach oherwydd, gan ystyried pa mor gul yw cwrpas Banc Seilwaith y DU, ni ellid ei ystyried yn olynedd gwirioneddol i Fanc Buddsoddi Ewrop. At hynny, codais y ffaith bod pwerau yn cael eu cadw yn ôl yn y Bil ar gyfer Canghellor a

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Correspondence.Rebecca.Evans@gov.wales
Gohebiaeth.Rebecca.Evans@llyw.cymru

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Thrysorlys ei Mawrhydi a dywedais yr hoffai Llywodraeth Cymru weld gwelliannau i'r Bil, fel bod pwerau cyfwerth ar draws gweinyddiaethau'r DU, cyn argymhell bod y Senedd yn cydsynio i basio'r Bil.

Er bod swyddogion yn parhau i ymgysylltu â'i gilydd mewn modd cymharol adeiladol, hyd yma, nid yw'r Bil wedi mynd i'r afael â phryderon a godwyd gan fy swyddogion i mewn perthynas â llywodraethiant y Banc.

2. A rannodd Llywodraeth y DU y Bil â Llywodraeth Cymru ar ffurf drafft? Os felly, pryd?

Rhannodd Llywodraeth y DU y Bil ar ffurf ddrafft gyda ni ar 14 Ebrill 2022 cyn cyflwyno'r Bil a'r Darlleniad Cyntaf yn Nhŷ'r Arglwyddi ar 11 Mai 2022. Cododd fy swyddogion ein pryderon cyffredinol ynglŷn â'r Bil gyda Llywodraeth y DU yn fuan ar ôl i'r Bil gael ei rannu â ni.

3. Os na wnaeth Llywodraeth y DU rannu'r Bil â chi ar ffurf drafft, o ystyried bod Banc Seilwaith y DU wedi bod yn gweithredu ar sail anstatudol ers mis Mehefin 2021, ac o ystyried y wybodaeth yr oedd Llywodraeth Cymru wedi'i chael gan Lywodraeth y DU ynghylch ei rhaglen ddeddfwriaethol, a wnaeth Llywodraeth Cymru fynd ati'n rhagweithiol i geisio dylanwadu'n uniongyrchol ar y broses o ddrafftio'r Bil?

Fel yr amlinellwyd yn fy ymateb i gwestiynau 1 a 2, rhannodd Llywodraeth y DU y Bil gyda ni ar ffurf ddrafft a gwnaethom geisio dylanwadu'n uniongyrchol ar y modd y draftiwyd y Bil.

4. Yn y memorandwm, rydych yn datgan eich bod wedi ysgrifennu at Ysgrifennydd Economaidd y Trysorlys "i'w annog i ddiwygio'r Bil er mwyn galluogi'r Senedd a Gweinidogion Cymru i gymryd eu rôl briodol o fewn strwythurau llywodraethiant i sicrhau atebolrwydd democrataidd priodol." Pa welliannau penodol i'r Bil yr ydych wedi gofyn amdanynt?

Nid yw'r Bil fel y'i cyflwynwyd yn darparu unrhyw rôl i'r Senedd, Gweinidogion Cymru, na swyddogion Llywodraeth Cymru o ran llywodraethiant y Banc. Er hynny, mae gweithgareddau penodol yn cael eu cadw'n ôl ar gyfer Senedd y DU, Canghellor a Thrysorlys ei Mawrhydi, megis y pŵer i Drysorlys ei Mawrhydi ddiwygio cyfeiriad strategol y Banc, gan gynnwys mewn meysydd lle y mae cymhwysedd wedi'i ddatganoli, heb ymgynghori â'r Senedd na Llywodraeth Cymru.

Rydym yn parhau i ddadlau y dylai Senedd a Llywodraeth Cymru, ill dwy, arfer pwerau sy'n gyfwerth â phwerau'r sefydliadau cyfatebol ar lefel y DU. Mae hyn yn angenrheidiol er mwyn bod yn gyson ag egwyddorion Cabinet Llywodraeth Cymru, sydd wedi'u rhannu â chi eisoes, hy "Rhaid i Lywodraeth Cymru fod â statws cyfartal i Lywodraeth y DU o ran llywodraethu cyrff trawsffiniol sydd â swyddogaethau datganoledig a sefydlir ym Miliâu'r DU."

Credwn y dylid bod cyfwerthedd rhwng deddfwrfeydd a llywodraethau'r DU o ran llywodraethiant y Banc fel bod ganddynt, er enghraifft, rolau cyfwerth i'w chwarae wrth bennu Cynlluniau a Blaenoriaethau Strategol y Banc. Byddai hyn yn golygu bod modd mireinio amcanion y Banc a gellid ailystyried blaenoriaethau a chynlluniau pan fo angen gan hefyd barchu cymwyseddau datganoledig yn llawn.

Bydd manylion penodol y gwelliannau yn destun trafodaethau parhaus â Llywodraeth y DU a byddaf yn rhoi'r wybodaeth ddiweddaraf i'r Senedd am ganlyniad y trafodaethau hynny fel y bo'n briodol maes o law.

5. Gellir newid cwmpas gweithgarwch y Banc, gan gynnwys y diffiniad o "seilwaith", drwy bwerau dirprwyedig a fydd yn ddarostyngedig i'r weithdrefn graffu gadarnhaol

yn Senedd y DU. Ym mharagraff 49 o'r memorandwm, rydych yn datgan eich bod wedi ysgrifennu at yr Ysgrifennydd Economaidd i'r Trysorlys "i ddadlau bod y Senedd, Gweinidogion Cymru a swyddogion Llywodraeth Cymru i gyd yn arfer pwerau cyfatebol i bwerau ein cymheiriaid yn y DU".

- i) A ydych wedi gofyn am welliannau i'r Bil a fyddai'n rhoi pwerau deddfwriaethol dirprwyedig uniongyrchol cyfatebol i Weinidogion Cymru, gan olygu y byddai'r Senedd yn gyfrifol am graffu ar y broses o arfer y pwerau hynny?
- ii) A ydych wedi gofyn am welliannau i'r Bil a fyddai'n rhoi rôl ymgynghorol i Weinidogion Cymru cyn i Weinidogion y DU arfer eu pwerau dirprwyedig, sy'n golygu na fyddai rôl i'r Senedd o ran craffu ar y broses o arfer y pwerau hynny?

Rydym yn parhau i ddadlau y dylai Senedd a Llywodraeth Cymru, ill dwy, arfer pwerau sy'n gyfwerth â phwerau'r sefydliadau cyfatebol ar lefel y DU. Mae hyn yn angenrheidiol er mwyn bod yn gyson ag egwyddorion Cabinet Llywodraeth Cymru. Felly, rydym yn ceisio consesiynau i'r Bil sy'n adlewyrchu'r egwyddorion hyn.

Yn gywir,



Rebecca Evans AS/MS

Y Gweinidog Cyllid a Llywodraeth Leol
Minister for Finance and Local Government